



Udruženje/udruga “BH novinari”, Kralja Tvrtka 5/5, 71000
Sarajevo Telefoni: 033 223 818, 033 217 302
E-mail: bhnovinari@bhnovinari.ba, WEB: www.bhnovinari.ba



LINIJA ZA POMOĆ NOVINARIMA / FREE MEDIA HELP LINE

MEĐUNARODNA ORGANIZACIJA ZA MIGRACIJE - IOM
Ulica Fra Andela Zvizdovića 1
71000 Sarajevo
Borna i Hercegovina

Datum: 16.1.2026.

Mjesto: Sarajevo

Broj protokola: 01 -2/26

Predmet: *Zahtjev za javno očitovanje o sprečavanju novinarke BIRN-a u obavljanju profesionalnog zadatka*

Poštovani/poštovana,

Udruženje BH novinari obraća vam se povodom prijave koju nam je uputila novinarka Balkanske istraživačke mreže BiH (BIRN), **Selma Melez**, a koja se odnosi na onemogućavanje njenog profesionalnog rada i uskraćivanje prava na razgovor sa tri migranta iz Sudana, trenutno smještena u Sarajevu.

Riječ je o osobama koje su tokom prolaska kroz Bosnu i Hercegovinu, na relaciji Bihać – Tuzla – Sarajevo, pretrpjele teške zdravstvene posljedice usljed promrzlina, uključujući amputacije ekstremiteta. Izvještavanje o njihovom slučaju je od nesumnjivog javnog interesa, kako zbog ozbiljnosti povreda i humanitarne dimenzije, tako i zbog pitanja odgovornosti institucija i postupanja prema migrantima u Bosni i Hercegovini.

Prema prijavi novinarke Melez Liniji za pomoć novinarima, tokom pokušaja da ostvari kontakt i dobije saglasnost za razgovor, upućivana je sa jedne institucije na drugu – od IOM-a, preko privatnog doma za starije osobe u kojem su migranti smješteni, do Službe za poslove sa strancima Ministarstva sigurnosti BiH. Na kraju je novinarke rečeno da dom postupi po instrukcijama IOM-a, te da je svim novinarima zabranjen ulazak i razgovor sa migrantima bez dozvole IOM-a, koju novinarka nije dobila.

Ovim putem želimo vas upozoriti da **nijedna organizacija, uključujući međunarodne i humanitarne, nema pravo sprečavati novinare da obavljaju svoj posao, naročito kada je riječ o punoljetnim osobama koje su zdravstveno stabilne i sposobne da same odluče da li žele razgovarati s medijima.** Uskraćivanje pristupa novinarima u ovom slučaju predstavlja **ozbiljno kršenje prava na slobodu izražavanja i informisanja, zagarantovanih domaćim zakonodavstvom i međunarodnim konvencijama.**

Posebno zabrinjava činjenica da se novinarima onemogućava direktan kontakt sa osobama koje su preživjele ekstremno nehumane uslove, što dodatno produbljuje sumnju u netransparentno i nedovoljno efikasno postupanje pojedinih institucija i organizacija uključenih u brigu o migrantima.

BH novinari zahtijevaju od IOM-a hitno očitovanje o ovom slučaju, kao i jasno pojašnjenje na osnovu kojih ovlaštenja se novinarima uskraćuje mogućnost razgovora sa migrantima koji su punoljetni i smješteni u ustanovu van nadležnosti bh. Službe za poslove sa strancima. Istovremeno i u interesu javnosti, **BH Novinari očekuju od IOM –a da hitno omogući novinarki BIRN –a Selmi Melez direktan, fizički kontakt sa tri migranta porijeklom iz Sudana radi snimanja intervjua** i informisanja javnosti o ovom slučaju iz perpektive samih migranata – žrtava neefikasnog domaćeg i međunarodnog sistema zaštite ljudi u pokretu.

Udruženje BH novinari će nastaviti pratiti ovaj slučaj i, ukoliko se praksa sprečavanja rada novinara nastavi, bit ćemo primorani o tome obavijestiti domaće i međunarodne institucije za zaštitu slobode medija i ljudskih prava.

S poštovanjem,

u ime BH Novinara,



Borka Rudić, generalna tajnica